

# Mga Talamdan Sa Cristohanong Pagtubo

Ni: Otto J. de la Torre



Guidelines For Christian Growth—Cebuano  
©2003 Foursquare Missions Press

*“Magkugi ka sa pagpakita sa imong  
kaugalingon nga nahamut-an sa Dios,  
usa ka magbubuhay nga walay  
igakaulaw, mahibalo nga mobahinbahin  
sa pulong sa kamatuoran.”*

*2 Timoteo 2:15*

Ang Ginoong Jesucristo nagtinguha sa labing maayo alang sa imong kinabuhi. Nagtinguha Siya nga ikaw molambo ug motubo diha sa mga pamaagi sa Ginoo, ug nga sa matag adlaw ikaw makaila Kaniya sa labing suod gayud ug nga ikaw makahibalo sa Iyang kabubut-on alang sa imong kinabuhi. Ania, gihatagan ko ikaw sa mga yanong awdag nga makatabang sa imong pagtubo bilang usa ka Cristohanon.

### **1. Basaba Ang Bibliya Matag Adlaw**

Ang Bibliya mao ang Pulong sa Dios. Bilang mga Cristohanon kita gihatagan sa espirituhanong pagkaon pinaagi sa Pulong sa Dios. Diha sa Bibliya atong makaplagan ang kabubut-on sa Dios alang sa atong mga kinabuhi ug makahibalo kita ug daghan mahitungod sa Ginoo ug sa pag-ila Kaniya, ug dugang pa. Ang Bibliya nagasulti kanato: “Ang tibook Kasulatan gisulat uban ang lamdag gikan sa Dios ug mapuslanon kini alang sa pagtudlo sa kamatuoran, sa pagbadlong, sa pagsaway, ug sa pagtudlo unsaon pagkinabuhi’g matarong, aron ang nag-alagad sa Dios masangkap pag-ayo ug maandam sa tanang maayong buhat.” (2 Timoteo 3:16,17)

### **2. Pag-ampo Matag Adlaw**

And pag-ampo mao ang pagpakigsulti sa Dios. Maka-ampo kita bisan asa, apan gikinahanglang maggahin kita ug bisan usa ka oras matag adlaw aron makigsandurot uban sa Ginoo. Toguti usab ang Dios sa pagpakigsulti kanimo. Kong nagaampo ka, isugid ang imong mga sala, pasalamat Siya sa tanang mga butang, dayega ug simbaha Siya tungod kay Siya Dios.

Ang Bibliya nagsulti kanato: “Pag-ampo sa tanang panahon.” (1 Tesalonica 5:17)

### **3. Pagtambong Sa Simbahan Diin Ang Pulong Sa Dios Mao Ang Ginawali.**

Sa dihang ang Ginoong Jesucristo mianhi sa kalibutan ug nagpuyo uban sa katawhan, sa kanunay miadto Siya sa sinagoga ug sa Templo didto sa Jerusalem aron sa pagsimba sa iyang langitnong Amahan. Kita nga mga Cristohanon kinahanglan mosundog sa Ginoo sa pagtigum sa usa ka lokal nga simbahan aron sa pagsimba ug sa pag-alagad sa Dios, ug sa pagpakighiusa uban sa mga kaigsuonan diha kang Cristo. Kinahanglan nga mahimo kitang mahiapil sa usa ka Cristohanong pundok diin ang tibook nga

Pulong sa Dios ang ginawali, ginatuohan ug gikinabuhi.

Ang Bibliya nagsulti kanato: “Dili undangon ang batasan sa pagtigum, sama sa gibuhat sa uban. Hinonoo, magdinasigay kita labi na kay nasayod kamo nga hapit na moabot ang Adlaw sa pagbalik sa Ginoo.” (Mga Hebreohanon 10:25)

#### **4. Insugid Ang Imong Mga Sala Sa Dios.**

Sa dihang makasala kita batok sa Dios o sa atong silingan, kinahanglan diha-diha dayon atong isugid ang atong sala sa Dios ug makighusay ta dayon sa tawo nga nahiubos kanato. Ang pagsugid sa atong mga sala sa Dios nagpasabot nga miduyog kita uban sa Dios mahitungod sa mga sayop nga atong nahimo, ug atong ginasulti sa Ginoo nga miila kita sa atong sayop nga buhat, unya nagatalikod kita gikan sa sala. Kong atong isugid ang atong mga sala sa Dios, Siya mohinlo kanato pinaagi sa Iyang dugo ug pasayloon kita.

Ang Bibliya nagsulti kanato: “Apan kon isugid nato sa Dios ang atong mga sala, tumanon niya ang iyang saad ug buhaton ang matarong ug mopasaylo gayod sa tanan tang mga sala ug maghinlo sa tanan tang mga kalapasan.” (1 Juan 1:9)

#### **5. Pagpamatuod Ngadto Sa Uban Pinaagi Sa Imong Pulong Ug Mga Gawi.**

Bilang usa ka Cristohanon ipamatuod nato si Cristo diha sa atong mga kinabuhi ug sa atong mga pulong ngadtong mga tawong nagapalibot kanato aron nga ang Dios mahimaya pinaagi sa atong kinabuhi. Hinumdumi nga ang mga mata niadtong wala makaila ni Cristo nagatutok kanato aron sa pagtan-aw kong ato ba gayud nga gikinabuhi ang atong ginawali.

Ang Bibliya nagsulti: “Si Jesus miingon kanila, ‘Kuyog kamo kanako ug tudloan ko kamo sa pagpanagat ug mga tawo.’” (Mateo 4:19)

#### **6. Tumana Ang Ginoo Diha Sa Tanang Mga Butang**

Kong gihigugma gayud nato si Cristo sa tinud-anay, atong buhaton unsa ang iyang ipabuhat kanato. Ang Cristohanon usa ka tawo nga natawo na pag-usab, nabag-o, ug nagasunod ug nagasundog ni Cristo sa tanang mga butang. Nasayud ang Dios kong unsa ang labing maayo alang kanato, ug kong pabuhaton kita Niya ug usa ka butang; kana tungod kay nasayud Siya unsa ang labing mahinungdanon alang kanato.

Ang Bibliya nagsulti kanato: “Kon tumanon nato ang mga sugo sa Dios, mapaniguro nato nga nakaila kita kaniya.” (1 Juan 2:3)

## **7. Sunda Ang Panig-ingnan Sa Ginoo Sa Pagpuasa.**

Sa kinatibuk-an sa Bibliya atong makaplagan kong giunsa sa mga magtutoo sa Dios ang nagpuasa diha sa pagkamatimuman ngadto sa Ginoo. Si Ginoong Jesucristo nagsulti nga human Siya mokayab ngadto sa langit, ang iyang mga tinun-an gikinahanglang magpuasa nga nagapangita sa iyang presensiya ug pagpakig-dait.

Ang Bibliya nagsulti kanato: “Si Jesus mitubag, ‘Naghunahuna ba diay kamo nga magsubo ang mga dinapit sa kombira sa kasal samtang ang pamanhonon uban pa kanila? Dili gayod! Apan moabot ang panahon nga ang pamanhonon kuhaon gikan kanila, ug magpuasa na unya sila.’” (Mateo 9:15)

Kong imong bansayon kining hamubo nga mga sugyot, sa dili madugay mosugod ikaw sa pagtubo ngadto sa pagkatinuod nga tinun-an sa atong Ginoong Jesucristo.

## **Ang Ginoo Ang Usa Ra Ka Dios**

### **I. Ang Dios: Tulo Ka Balaang Persona**

“Unya miingon na usab ang Dios, ‘Buhaton nato ang tawo sama sa atong dagway . . .’” (Genesis 1:26)

“Ug karon moanha ako kanimo; dili na ako magdugay dinhi sa kalibutan, apan magpabilin sila dinhi. Balaang Amahan, bantayi sila diha sa gahum sa imong ngalan — ang ngalan nga imong gihatag kanako, aron sila mausa ingon nga ikaw ug ako usa lamang!” (Juan 17:11)

### **II. Ang Dios: Amahan, Anak, Ug Espiritu Santo**

“Busa panglakaw kamo ngadto sa tanang katawhan sa tibuok kalibutan ug himoa sila nga akong mga tinun-an, ug bunyagi sila sa ngalan sa Amahan, sa Anak, ug sa Balaang Espiritu.” (Mateo 28:19)

“Mag-uban unta kaninyong tanan ang grasya sa Ginoong Jesucristo, ang gugma sa Dios, ug ang pagpakig-ambit sa Balaang Espiritu.” (2 Corinto 13:14)

### **III. Ubang Kinaiya Sa Dios**

“Sa kasiyaman ug siyam na ang panuigon ni Abram, nagpakita kaniya ang Ginoo ug miingon, “Ako ang Dios nga labing Gamhanan. Pag-masinugtanon kanako ug ayaw pagpakasala sa tibook mong kinabuhi.” (Genesis 17:1)

“Ug hinaut unta nga ang Dios nga tinubdan sa pailob ug kadasig maghiusa sa inyong mga hunahuna pinaagi sa pagsunod sa panig-ingnan ni Cristo Jesus.” (Mga Taga Roma 15:5)

“Ug ang Dios, uban sa naghingapin niyang bahandi diha kang Cristo Jesus, magsangkap sa tanan ninyong mga kinahanglan.” (Mga Taga Filipos 4:19)

“Ang wala mahigugma sa iyang isigkatawo wala makaila sa Dios, kay ang Dios gugma man.” (1 Juan 4:8)

“Gipasaylo niya ang tanan kong mga sala, ug giayo niya ang tanan kong mga balatian.” (Salmo 103:3)

### **Pagbunyang Sa Tubig**

#### **I. Ang Pagbunyang Diha Sa Tubig Usa Ka Sugo Ni Jesus**

##### **Ngadto Sa Iyang Iglesia**

“Ang motuo ug magpabunyang maluwas, apan ang dili motuo, silotan.” (Marcos 16:15)

#### **II. Ang Pagbunyang Sa Tubig Usa Ka Panag-ingnan Nga Takus Sundon Si Jesucristo Nagpabunyang**

“Sa pagkahuman gayud ug bunyang kang Jesus, mihaw-as siya sa tubig...” (Mateo 3:16)

##### **Ang Mga Tinun-an Gibunyanan**

“...miingon si Jesus kanila, ‘Makainom gayud kamo sa kupa akong imnan ug makapabunyang kamo sa paagi nga ako bunyanan.’ (Marcos 10:39)

#### **III. Ang Kahulogan Sa Pagbunyang Sa Tubig**

“Tungod niini, sa pagbunyang kanato gilubong kita uban kaniya ug miambit sa iyang kamatayon, aron ingon nga si Cristo gibanhaw sa mahimayaong gahum sa Amahan, kita usab magpuyo diha sa bag-ong kinabuhi.” (Mga Taga Roma 6:4)

Ang pagbunyang sa tubig usa ka timaan sa kamatayon ug pagkabanhaw ni

Jesucristo.

#### **IV. Ang Pamaagi Sa Pagbunyag Sa Tubig**

Ang pulong “pagbunyag” nagkahulugan nga: paglusbog o pag-unlod, hingpit nga paglusbog ilalum sa tubig.

“Nga sa gilubong kamo uban kaniya diha sa bunyag, diin gibanhaw kamo uban kaniya, pinaagi sa pagtoo sa buhat sa Dios, nga nagbanhaw kaniya gikan sa mga minatay.” (Mga Taga Colosas 2:12)

“Busa panglakaw kamo, ug panudloan ninyo ang tanang mga nasud, nga magabunyag kanila sa ngalan sa Amahan, ug sa Anak, ug sa Espiritu Santo.” (Mateo 28:19)

### **Ang Ministeryo Ni Ginoong Jesucristo**

#### **I. Jesucristo: Ang Dios Nga Nagpakatawo**

##### **A. Si Jesucristo Dios**

“Kang kansa ang mga amahan, ug gikan kanila si Cristo mahatungod sa unod, nga mao ang sa ibabaw sa tanan, ang dalayegon nga Dios sa walay katapusan. Amen.” (Mga Taga Roma 9:5)

##### **B. Ang Pagkatawhanon Ni Jesus**

“Batoni ninyo kini nga hunahuna nga diha usab kang Cristo Jesus. Nga, sa nagalungtad sa kinaiya sa Dios, wala mag-isip sa iyang pagkasama sa Dios ingon nga usa ka butang nga pagaagawon, kondili naghukas siya sa iyang kaugalingon, nga misul-ob sa dagway sa usa ka ulipon nga gihimo sama sa mga tawo; ug sa hingkit-an siya sa dagway sa usa ka tawo, nagpaubos siya sa iyang kaugalingon, nga nahimo nga masinugtanon bisan hangtud sa kamatayon, oo, sa kamatayon sa krus.” (Mga Taga Filipos 2:5-8)

#### **II. Ang Ministeryo Ni Jesucristo**

##### **A. Giluwas Ni Jesucristo Ang Tawo Gikan Sa Iyang Mga Sala**

“Kay gihigugma sa Dios ang kalibutan, sa pagkaagi nga gihatag niya ang iyang Anak nga bugtong, aron ang tanan nga motoo kaniya dili mawala, kondili may kinabuhi nga walay katapusan.” (Juan 3:16)

“Nga kaniya anaa ang atong katubsananan pinaagi sa iyang dugo, ang pasaylo sa atong mga paglapas, sumala sa pagkadato sa iyang gracia.” (Mga Taga Efeso 1:7)

## **B. Si Jesucristo Nagaayo Sa Balatian Sa Tawo Ug Nagahingilin Sa Mga Yawa**

“Ug giayo niya ang daghang mga masakiton sa nagkalainlaing sakit, ug gihinginlan niya ang daghang mga yawa, ug wala niya tugoti sila sa pagsulti, kay sila nakaila kaniya.” (Marcos 1:34)

“Si Jesucristo mao sa gihapon ang sa kagahapon ug karon, oo ug sa walay katapusan.” (Mga Hebreohanon 13:8)

## **C. Si Jesucristo Nagahingpit Sa Cristohanon**

“Kay kadtong mga giila niya nga daan, gipili usab niya nga daan, aron mahisama sa dagway sa iyang Anak, aron siya mahimong panganay sa daghan nga mga igsoon.” (Mga Taga Roma 8:29)

## **D. Si Jesucristo Mobalik Aron Sa Pagkuha Sa Mga Cristohanon**

“Sa balay sa akong Amahan adunay daghan nga puloy-anan, kong wala pa unta, moingon unta ako kaninyo; Ako moadto sa pag-andam ug dapit alang kaninyo. Ug kong ako makaadto na, ug makaandam kaninyo ug dapit, moanhi ako pag-usab, ug panad-on ko kamo uban gayud kanako; aron nga kong asa ako atua usab kamo.” (Juan 14:2,3)

## **Ang Ministeriyo Sa Espiritu Santo**

### **I. Ang Espiritu Santo**

#### **A. Ang Espiritu Santo Dios**

“Wala ba kamo manghibalo nga kamo templo sa Dios, ug nga ang Espiritu sa Dios nagapuyo diha kaninyo?” (1 Corinto 3:16)

#### **B. Ang Espiritu Santo Balaan Nga Persona**

“Apan kong siya, ang Espiritu sa kamatuoran moanhi na, siya magamando kaninyo sa tibook nga kamatuoran; kay siya dili mosulti sa iyang kaugalingon, kondili nga siya magapamulong sa tanan nga iyang hingdunggan; ug magapahayag kaninyo sa mga butang nga mahitabo.” (Juan 16:13)

### **II. Ang Kinadak-ang Ministeriyo Sa Espiritu Santo**

“Siya magahimaya kanako, kay siya modawat niadtong mga ako, ug magapahayag niini kaninyo.” (Juan 16:14)

### **III. Ang Bautismo Sa Espiritu Santo**

#### **A. Si Jesucristo Ang Nagabautismo Sa Espiritu Santo**

“. . . siya (Jesucristo) magabautismo kaninyo sa Espiritu Santo ug sa kalayo.” (Mateo 3:11)

#### **B. Ang Adlaw Sa Pentecostes: Ang Bautismo Sa Espiritu Santo**

“Ug nangapuno silang tanan sa Espiritu Santo, ug nanagsugod sila pagsulti sa nagkalainlaing mga sinultihan, ingon sa gihatag kanila sa Espiritu Santo aron ikasulti.” (Mga Buhat 2:4)

#### **C. Si Jesucristo Mao Sa Gihapon Ug Nagapadayon Sa Pagbautismo Sa Espiritu Santo**

“. . . dili ba labi pa ang inyong Amahan nga langitnon magahatag sa Espiritu Santo sa mga managpangayo kaniya?” (Lukas 11:13)

### **IV. Ang Pagkapuno Sa Espiritu Nga Kinabuhi**

#### **A. Kita Ginasugo Sa Pagkapuno Sa Espiritu**

“. . . Himoa nga mapuno kamo sa Espiritu.” (Mga Taga Efeso 5:18)

#### **B. Makadawat Kita Pinaagi Sa Pagtoo Kong Mangayo Kita Nga Adunay Pagsalig**

“Ug kini mao ang pagsalig nato kaniya: nga kong mangayo kita bisan unsang butanga sumala sa iyang kabubut-on, siya magapatalinghug kanato.” (1 Juan 5:14)

### **V. Kinahanglang Magkinabuhi Kita Diha Sa Espiritu**

“Busa giingon ko: Maggawi kamo sumala sa Espiritu, ug dili kamo magatuman sa kailibgon sa unod.” (Mga Taga Galacia 5:16)

### **VI. Gikinahanglan Nga Giyahan Kita Sa Espiritu Santo**

“Kay sumala sa gidaghanon sa mga gidala sa Espiritu sa Dios, kini sila mga anak sa Dios.” (Mga Taga Roma 8:14)